



Lago Maggiore cun Locarno ed Ascona.

U. MOLT/PIXELIO



Il vitg da Morcote al Lai da Lugano.

DAAROM/PIXELIO

Il Tessin – in gir tras il chantun al sid da las Alps

■ In clima miaivel, ina cuntrada ch'è caracterisada da muntognas, da muts e da lais, ina vegetaziun che mida da mediterranean ad alpin, ina situaziun strategicamente impurtanta, la piazza da finanzas la terz gronda da la Svizra, in'attracziun turistica, in pajais ch'è caracterisà da la mentalità latina cun bleras tradiziuns, ritgezas architectonicas e culturalas, vitgs pittorescs e centers urbans: quai èn ils fatgs caracteristics ils pli impurtants dal chantun Tessin. Il Tessin giascha al sid da las Alps e furma, ensemen cun las valladas grischunas Mesauca, Calanca, Bergiaglia e Puschlav, la Svizra da lingua taliana. Per gronda part è il Tessin circumdà da l'Italia (regiuns Piemunt e Lombardia); en il nord e nordost giaschan ils chantuns



svizzers Valais, Uri e Grischun. La surfatscha dal Tessin cumpiglia 2812 km², quai che correspunda a 7 procent da la surfatscha da la Svizra. Il dumber da 336'943 abitants ed abitants correspunda a 4,3 procent da la populaziun svizra.

Il chantun Tessin dumbra 8 districts ch'èn pli u main identicas cun las singulas valladas e cuntradas. Partind dal nord suandain nus questas regiuns sin noss gir tras il Chantun, faschond staziun en divers lieus per vegnir a savair dapli da la geografia, l'istorgia, las tradiziuns e la situaziun actuala dal Tessin.

Leventina

En il nordvest dal Tessin giascha la Val Bedretto che cumenza al Pass dal Nufenen (cunfin vallesan) e maina enfin ad Airolo. Da quest vitg da transit, situà al pe dal Pass dal Gottard, maina la Val Leventina sur Faido enfin a Bodio e Biasca. En stretga relaziun cun ils vitgs d'Airolo e Bodio stat la

lung'istorgia da l'erecziun da vias e tunnels che collian il Tessin cun la part da la Svizra situada al nord da las Alps.

Las vias commercialas sur ils pass alpines erigidas a l'entschatta dal 19avel tschientaner avevan pudì liberar in pau il Tessin or da si'isolaziun geografica entaifer il pajais. Ma pervia da las navadas ed il privel da lavinas restan quests passadis serrads durant ils mais d'enviern.

Pir dapi l'avertura dal Tunnel da viafier dal Gottard che maina d'Airolo a Göschenen (1882) exista ina colliaziun tranter il Tessin ed il rest da la Svizra averta l'entir onn. Il 1967 è alura suandà il Tunnel d'autos dal San Bernardin ed il 1980 quel dal Gottard. Actualmain vegn erigi il Tunnel da basa dal Gottard che vegn a manar da Bodio ad Erstfeld. L'avertura è prevista il 2016.

Val Blenio

Il district Blenio tanscha dal Pass dal Lucmagn sur Olivone ed Acquarossa enfin avant Biasca. Questa vallada ans dat chaschun d'emprer ad enconuscher ina da las tradiziuns vivas dal Tessin las pli enconuschantas, numnadain las milissas istoricas en la Val dal Blegn.

Mintg'on sa participeschan las milissas istoricas da Leontica, d'Aquila e da Ponto Valentino a la festa da son Gion Battista (24 da zercladur), a la festa da Nossadunna dal rusari (emprima dumengia da fanadur) ed a las festivitads en onur da Nossadunna dal Carmel (terza dumengia da fanadur). Ils commembers da las milissas da Leontica e d'Aquila portan uniformas che sumeglian quellas da las truppas svizras sut Napoleon Bonaparte; las uniformas da la milissa da Ponto Valentino derivan dal temp avant l'Emprima Guerra mundiala.

Ils origins da quest usit stattan en connex cun in vut che schuldads da la Val dal Blegn avevan fatg il november 1812 durant la battaglia desastrusa a la Beresina

(Russia), da la quala er in grond contingent svizzer ha fatg part. Ils schuldads tessinai han empermess solennamain da crear ina milissa, sch'els turnian sauns e salv a chasa. Ditg e fatg; dapi dus tschientaners enrameschan las milissas ensemen cun las confraternitads localas las trais festas.

Riviera

Per quel che vegn dal nord s'avra la Riviera tuttenina a la confluenza da las vals alpines Leventina e Blenio. Al turist interessà mussan las vischnancas dad omaduas varts da Biasca, la chapitala dal district, las perditgas da lur passà istoric ed il maletg d'ina industrialisaziun moderna. Tar quest maletg tutgan baselgias e clutgers romans, chasas da pastiziers, vegls centers en il plaun ed en las muntognas, chavas da granit, agricultura ed allevament e fabricas cun in'alta tecnologia.

Ma confluenza da las vals munta sa chapescha er confluenza dals flums: il num dal Chantun deriva dal flum Ticino che nasscha al Pass dal Nufenen e percurra la Val Bedretto e la Leventina; avant Biasca sbucca il flum Brenno en il Ticino, ed avant Bellinzona la Moesa. Silsuenter curra il Ticino tras la Planira da Magadino enfin en il Lago Maggiore.

Bellinzona

Bellinzona è bain «be» la segund gronda citad dal Tessin (Lugano: 60'815 abitants; Bellinzona: 17'544; Locarno: 15'303; Mendrisio: 14'321). Ma grazia a sia posiziun geografica furma Bellinzona la chapitala dal Chantun, la sedia da la Regenza ed il lieu da sesida dal parlament chantunal.

L'ensaina da la citad furman ils trais chastels da Bellinzona (Castelgrande, Montebello e Sasso Corbaro) che fan part dal Patrimoni cultural mundial da l'Unesco dapi l'onn 2000. Questas fortèzzas ans lubeschan da dar in curt sguard enavos en l'istorgia medievala dal Chantun.

Il Tessin sa chatta en ina zona da contact

tranter duas culturas e modas da viver. Al cumenzament dal segund millenni occupava il Tessin ina rolla impurtanta en il giu da pussanza tranter ils dominis dal nord e dal sid. Dad ina vart existiva l'Imperi tudestg cun ses differents imperaturs, sco era pli tard la Confederaziun svizra, entant che la Republica da citad ed il chapitelatedral da Milau sa chattavan da l'autra vart. Dal 10avel al 14avel tschientaner empruvavan domaduas partidas da gudagnar il Tessin dad oz. La finala duevan ils Confederads prender possess da la regiun, l'integrond en lur domini sco terra subdita. Quest status da subordinaziun è pir i a fin cun la mediaziun dal 1803. Dapi lura furma il Tessin in chantun da la Svizra cun dretgs eguals.

Locarno

Il district Locarno cumpiglia la Planira da Magadino (situada tranter Bellinzona ed il Lago Maggiore), il Gambarogno da vart sanestra dal lai, la regiun da Tenero – Locarno – Ascona – Brissago da vart dretga dal lai, plinavant la Val Verzasca sco er il Centovalli e la Val Onsernone. Locarno è tranter auter enconuscher per ses festival dal film, in'occurrèza da renum mundial cun represchentaziuns en kinos e sin la Piazza Grande sin ina da las tailas las pli grondas dal mund.

Las inslas da Brissago furman l'iert botanic dal Tessin. Plantas subtropicas prospereschan sut tschiel serain – il clima miaivel renda quai pussaivel. En il curtin cun ina grondezza da 2,5 hectaras creschan 1500 sorts da plantas da la regiun da la Mar Mediterranea e da las Subtropas da l'Asia, da l'Africa, da l'America e da l'Oceania. Las plantas exoticas attiran turistas e turists ed èn er d'interess scientific.

Corippo en la Val Verzasca è cun sulettain 18 abitants la pli pitschna vischnanca da la Svizra. Il vitget muntagnard tessinai stat sut la protecziun da la tgira da monuments. La mesadad dal 19avel tschientaner vivevan qua anc passa 300 persunas, oz n'hai nagins uffants pli en vischnanca.

Val Maggia

La Val Maggia cumenza davos il delta da Locarno/Ascona e maina sur 50 km vers nord. En la part sura sa divide la val en pliras vals laterales ch'èn abidades be parzialmain. A la fin d'ina da quellas giascha il vitget da Bosco/Gurin che furma ina particularitad sco suletta vischnanca gualsra dal Tessin.

Lieu principal dal Distretto Vallemaggia furma Cevio che sa chatta 23 km al nordvest da Locarno. Avant passa 100 onns han ils abitants da Cevio costruì a la Maggia cuntschets da crappuns. Quests rempars protegian anc oz dal flum che daventa incalculabel en cas da malauras. Er oz furma l'elavuraziun da crap (chava da gnais) ina da las branschas economicas las pli impurtantas da la regiun. Il Museo di Vallemaggia tematisescha la diminuziun da la populaziun en la Val Maggia antruras ed oz.

Lugano

Il chantun Tessin dependa fermamain dal turissem. Il clima mediterranean ed il flair talian al sid da la Svizra attiran mintg'on fitg blers turists. En il Sopraceneri, la vart settentriunala dal Chantun, furman Bellinzona, Locarno ed Ascona centers turistics. Da l'autra vart dal Monte Ceneri – il passadi che collia la Planira da Magadino cun la Val Veduggio – sa chatta il Sottoceneri che cumpiglia ils districts da Lugano e Mendrisio. Lugano furma la quarta destinaziun turistica enconuschanta lunsch sur ils cunfins.

Qua sa chatta er l'Universitad da la Svizra taliana (USI) che furma l'unic lieu da furmaziun universitara da la Svizra italofofona. L'USI exista dapi l'onn 1996 e cumpiglia mintgamai ina facultad per ciencias da comunicaziun e per ciencias d'informatica sco er l'academia d'architectura.

A la riva dal lai en fatscha a la citad da Lugano s'auza il Monte San Giorgio (1097 m). Questa muntogna è d'ina valur culturala e scientifica extraordinaria grazia a ses stgaziuns geologics e grazia a ses fossils che van enavos fin en il temp dal trias mesauca (avant 230 milliuns onns). L'onn 2003 è il Monte San Giorgio perquai vegnì recepì sco Patrimoni natural mundial da l'Unesco.

Mendrisio

Il Rempar da Melide maina la finala en il district situà il pli en il sid dal Chantun, il Distretto di Mendrisio u Mendrisiotto, cun la citad da medem num e cun Chiasso al cunfin tar l'Italia.

Mendrisio è enconuscher per las processions da l'Emna songta. Quellas èn documentadas dapi la segunda mesadad dal 17avel tschientaner e mainan la saira da la Gievgia songta e dal Venerdì songt tras la citad veglia da Mendrisio. Per questa chaschun vegn stizzada l'illuminaziun da las vias ed en las giassas sa derasa la glisch miaivla dals «transparents»: gronds maletgs glischants ch'èn stendis per lung da la ruta da la procession sur las giassas vi e che represchentan scenas da l'Evangelii u dal Vegl Testament.

La saira da la Gievgia songta preschentan dunsainas d'acturs laics la Passiun da Cristen en ina seria da scenas che sa basan sin l'Evangelii. A questas represchentanziuns sa participeschan chavaltgaders, schuldads romans e figuras biblicas en costums pompus. La procession dal Venerdì songt è modesta e solenna ed è caracterisada pli fitg da la spiritualitad. A questa procession sa participeschan passa 600 commembers da differentas confraternitads e d'associaziuns ecclesiasticas.

La preschentaziun:
Dossier «Chantun Tessin»

Dapli infurmaziuns:
chatta.ch/?hiid=1392
www.chattà.ch



Bosco/Gurin – anteriura colonia gualsra entadim la Val Maggia.

RUDI/PIXELIO